

Inuussutissarsiutigalugu aalisarnikkut angallateeqqanik kvoteqartussanik minnerpaaffiliinissami takissuseq 9 meter aallaavigalugu pitsaaqutinik ajoqutinillu nassuiaateqaqqullugit ukiuni 12 ikaarsaariarfeqartillugit Naalakkersuisut nalunaarusioqqullugit peqquneqarnissaanik Inatsisartut aalajangiiffigisassaattut siunnersuut.

(Inatsisartunut ilaasortaq Henrik Fleischer, Siumut)

Akissuteqaat

(Aalisarnermut, Piniarnermut Nunalerinermullu Naalakkersuisoq)

Siullermeerneqarnera

Inuussutissarsiutigalugu aalisarnikkut angallateeqqanik pisassiissuteqartussanik minnerpaaffiliinissami takissuseq 9 meter aallaavigalugu pitsaaqutinik ajoqutinillu nassuiaateqaqqullugit ukiuni aqqaneq marlunni ikaarsaariarfeqartillugit Naalakkersuisut nalunaarusioqqullugit peqquneqarnissaanik Inatsisartut aalajangiiffigisassaannik Henrik Fleischer, Siumut, siunnersuuteqarneranik Naalakkersuisut qutsavigaat.

Aallaqqaasiutigalugu oqaatigissavara siunnersuutaasup kalaallisut allanneqarnerani angallatit mikinerusut pineqarmata, taamaattumillu siunnersuut imatut paasivara angallatit mikinerusut pisassiissuteqartut minnerpaamik 9 meterinik takissuseqarnissaannik atuutilersitsineq siunnersuutaasoq, angallatillu taakku tamarmik 9 meterit sinnerlugit takissuseqartut aalisarsinnaasaminnik aalajangersimasunik pisassiissuteqassasut pisassiissutillu ukiuni aqqaneq marlunni ikaarsaariarfeqartinneqassasut. Angallatit mikinerusut 9 meterit ataallugit takussuseqartut tamarmik ataatsimut pisassiissutinik aalisarsinnaassasut aalisakkallu ataatsimoorullugit aalisarneqassasut.

Angallatinut ataasiakkaanut aalajangersimasumik pisassiissuteqartitsilluni malittarisassaqaqtitsinermi iluaqutit arlallit Naalakkersuisut imaliinnarlutik takusinnaavaat. Avannaani pitsaasunik misilittagaqarluni angallatit 6 meterit sinnerlugit takissusillit atorlugit sinerissap qanittuani maannakkut ukiorpassuarni raajarniartoqarnikuuvoq qaleralinniartoqarnikuullunilu. Akerlianik umiatsiaaqqat mikinerusut atorlugit ataatsimut pisassiissutinik ataatsimoorullugit aalisarnerat aalisalersinnaanerullu annertunerusumik annikinnerusumilluunniit killeqannginnera ajornartorsiutitaqarpoq.

Naalakkersuisut isumaqarput siunissami aalisarnerit tamarmik imatut malittarisassaqaartinneqassasut angallatit ataasiakkaat aalajangersimasumik pisassaqaqlutik. Naalakkersuit anguniagaat pingaarneq tassaavoq piffissaq sivisooq eqqarsaatigalugu aalisarneq piujuartitsinissaq tunngavigalugu ingerlanneqassasoq kiisalu aalisarnermit inuiaqatigiit aningaasaqarnikkut annertunerpaamik pissarsisassasut. Tamanna ilaatigut anguneqarsinnaavoq sinaakkutaasunik imminnut atasunik allanngoranngitsunik atugassaqaqtitsinikkut, tassani nalorneq annikillisinneqassalluni, taamaalillunilu aalisarnerup

ineriartorteqqinnissaanut iluaqutaasumik aningaasaliinissaq pilerinartunngortinneqassalluni. Taamaaliortoqassaaq aningaasaliisarnernut qularnaatsumik qularnaveeq-quisiisoqartartinniarlugu aalisarsinnaassuseqarluarnerlu siuarsarniarlugu, inuussutissarsiortut taamaalillutik aalisariutaatik aserfallatsaaliorsinnaaniassammatigit nutaalianillu taarserartuarlugit.

Naalakkersuisut taamaammat kissaatigineqartutut nassuiaasiussapput.

Taamatut oqaaseqarlunga aalajangiiffigisassatut siunnersuutip akuerineqarnissaa Naalakkersuisut inassuteqaatigaat.